

Novinska agencija Fena, 13. mart/ožujak 2012.

## **SVILANOVIĆ: ZEMLJE REGIONA MOGU RAČUNATI NA VEĆI IZNOS IZ IPA 2**

**SARAJEVO, 13. marta (FENA) - Evropska komisija, zemlje u procesu pridruživanja kao i drugi partneri, uključujući i Savjet za regionalnu saradnju (RCC), u ovom trenutku rade na konačnom izgledu novog instrumenta pretpristupne pomoći (IPA 2). Ovaj instrument trebalo bi da bude u primjeni od 2014. godine. Sada je pravo vrijeme za što aktivnije učesće regiona, odnosno korisnika ovih fondova EU, da bi njihovi interesi bili maksimalno uvaženi, a sve promjene su moguće samo do kraja godine, izjavio je za Agenciju FENA generalni sekretar RCC-a Goran Svilanović.**

Već sada, kaže Svilanović, neki trendovi će zasigurno imati pozitivan uticaj na sadržaj i karakter pretpristupne pomoći, posebno u regionalnoj dimenziji, tzv. „višenamjenske IPA 2“.

- Regionalna razvojna strategija SEE 2020 koju RCC razvija sa zemljama regiona i drugim partnerima ima prominentno mjesto u procesu oblikovanja IPA 2, te već imamo punu podršku Evropske komisije za implementaciju ove strategije u narednom periodu. Očekujemo da će SEE 2020 strategija postati integralni dio programiranja IPA 2 instrumenta i da će se dati prednost onim aktivnostima koje RCC zajedno sa zemljama regiona prepozna kao regionalni prioritet u implementaciji strategije SEE 2020. Samim tim, već sada imamo značajno usaglašavanje između interesa i potreba regiona s jedne i Evropske komisije s druge strane - navodi Svilanović.

Na pitanje FENA-e o očekivanoj finansijskog podršci, Svilanović je rekao da, se u ovom trenutku zna, da će IPA 2 pretrpjeti određene promjene, u svom karakteru kao i u ukupnom iznosu u odnosu na prethodni period.

- Ukupan budžet EU je manji, pa je tako i obim raspoloživih sredstava za region manji. Međutim, iskorištenost prethodnog mehanizma, IPA 1, od zemalja u regionu, bila je oko 50 posto od ukupno raspoloživih sredstava. Zato bi zemlje iz regiona, koje su sada već znatno spremnije da „povuku“ sredstva iz EU, mogle računati na veći iznos, ako nastave da budu efikasne u predlaganju konkretnih projekata u skladu sa zahtjevima novog finansijskog instrumenta - pojasnio je Svilanović.

Također je naglasio da neće biti različitog tretmana zemalja u zavisnosti od njihovog statusa u procesu pridruživanja, tako da će sve zemlje imati jednak pristup svim komponentama IPA 2 fondova.

- IPA 2 će takođe imati fokusiran, sektorski pristup, gdje bi većina pretpristupne pomoći bila usmjerena u prioritetne sektore koje utvrde same zemlje. Zbog toga i RCC i svaka pojedina zemlja sada moraju da iskoriste priliku i da u narednim mjesecima jasno predstavljaju Komisiji svoje prioritete, da naznače koji su to sektori koji su od najvećeg značaja za postizanje

ekonomskog rasta u svakoj zemlji ponaosob da bi zemlje što spremnije bile i za nastavak procesa pridruživanja - rekao je Svilanović.

Novi instrument finansijske i razvojne podrške u pretpristupnom periodu dizajnira se uz puno učešće korisnika.

- Za razliku od prethodnog perioda gdje je svakoj od zemalja dodijeljen prethodno utvrđeni iznos pomoći, u narednom periodu možemo očekivati drugačiji pristup. Naime, iznos finansijske pomoći će biti srazmjeran uspješnosti pojedine zemlje u korištenju sredstava, tako da će zemlje imati snažan podsticaj da razviju vlastite kapacitete, podignu apsorpcionu moć i pokažu da u punoj mjeri poštuju preuzete reformske obaveze - rekao je u razgovoru za Agenciju FENA generalni sekretar RCC-a Goran Svilanović.

RCC u saradnji s Evropskom komisijom ima važnu ulogu u pripremi izvještaja, u ocjeni napretka svake pojedine zemlje u procesu pridruživanja. Također, RCC će biti konsultovan prilikom donošenja odluka o korišćenju ovih fondova na regionalnom nivou.

(Fena) gk/bdž